

Amante di deporte y baluarte Arubiano, Eddy Ras

Condecorá pa Gobierno



Eduard Anthony "Eddy" Ras a nace na Aruba dia 22 di Januari 1950 y ta casá cu Sra. Oneida Mercedes Ras-Valdes y tin dos jiu.

Eddy ta un deportista hopi conocí y popular na Aruba. Un persona cu a haci varios deporte y a sa di representá su isla Aruba y Antiyas Hulandes den casi tur deporte. For di chikito Eddy a gusta haci deporte. Eddy a cumenzá haci deporte den e barrionan di Socotoro y Companashi.

Eddy a militá den e ekipo di Oso Grapebaogúadie conocido entrenador Sr. Chipen Chirino den Little League. Den Junior League el a hunga pa e team di Kodak bao di guía di e legendario Luis Swaen. Cu e edad di 16 aña Eddy a pasa pa hunga cu e team di Marlboro y a hunga nueve aña como short-stop y tercer base. Eddy a participá den diferente campeonato Antiyano cu Marlboro y tambe tabata den seleccion di Aruba den Little, Junior y Senior League.

Den e deporte di futbol Eddy a hunga for di jong den ekipo di Aruba Junior. Cu 16 aña di edad el a hunga den hoofd class, despues Eddy a pasa pa hunga pa e ekipo di RCA den cual el a hunga Campeonato Antiyano. Tambe tabata seleccionado den futbol hubenil y senior. Varios biaha Eddy tabata den seleccion di Antiyas pa weganan di Reino na Hulanda y Surnam y tambe pa pre-cualificacion mundial, bao guía di e legendario entrenador Angel Bota di

Aruba, Shon de Haseth (q.e.p.d.) y Sr. Confesor di Corsow.

Eddy a hunga varios aña pa e ekipo softball di Aldo y a participá den varios campeonato Arubano y Antiyano cual ekipo a sali victorioso.

Deporte di Judo tabata e deporte cu Eddy tabata gusta masha hopi mes. Eddy a obtené faha bruin y lamentablemente net ora cu Eddy a wordo seleccioná pa un campeonato mundial di Judo na Canada cu e edad di 20 aña bao guía di Ramon Sharp y Carlos Bislip (q.e.p.d.) mester a retirá for di e deporte di Judo pa motibo di un lesion na na su rudiya.

Eddy a hunga basket cu e ekipo di Aruba Juniors y tambe pa ekipo di RCA A-class y a hunga pa seleccion di Aruba. Eddy a hunga contra ekiponan manera Site di Corsow, Pasadena College di USA y Chinese Little Devils di Surnam. Tambe tabata coach di ekipo di RCA B-class y cu a titulá varios biaha como campeon di Aruba.

Eddy tabata campeon di Junior y Senior di Aruba pa varios aña. Pa 15 aña largo Eddy tabata campeon di Aruba, tres biaha el a gana Campeonato Antiyano di Tennis den parti individual y pa 5 biaha den dobel. Tambe el a hunga dobel mixto den Campeonato Amityano cual tambe el a bin cu título pa Aruba.

Eddy su entrenador di tennis tabata Armando Vieira di Brasil di cual Eddy ta masha gradicí. Eddy ta ser considerá como un di e mihor tenista di Aruba den tur tempo. Fuera di campeonato local y Antiyano, Eddy a participá na clásiconan di Marlboro y ALM, weganan Pan y Centro Americano, torneonan den Suramerica y Merca.

Eddy a yega di hunga contra un constelacion di hungadornan di fama mundial. Desde 1970 Eddy ta entrenador di tennis. Y a traha 25 aña na Aruba Caribbean Hotel/Golden Tulip. Actualmente Eddy ta entrenador na su mesun club cual ta e conocido Eagle Tennis Club. Eddy ta gradicí su mayornan cu a motivé pa haci deporte y tambe na tur su entrenadornan.